

## Takornariaqarnermut kisitsisit

Takornariaqarnermut misissueriaaseq nutaaq atorlugu kisitsisit 2006-imut 2007-imullu tunngasut saqqummuinneqarput. Naatsorsueqqissaartarfiup Air Greenland A/S Mittarfeqarfiillu suleqatigalugit misissuineq suliaraat. Takornarissat 20.000-it missaat ukiut tamaasa nunatsinniit aallalernermi apeqqutinik akisiffissamik tunineqartarsimapput, taakkulu affaasa missaat akineqarsimasut Naatsorsueqqissaartarfimmut utertinneqarsimallutik. Misissuinerup takutippaa takornariaqarnerup qanoq isikkoqarnera, takornarissat ulloq unnuarlu agguaqatigiissillugu aningaasartuutaat, takusanik nalilersuinerat tullissaanullu kissaataat paasisat nutaat ilagivaat. Sulili oqaatigineqarsinnaanngilaq takornarissat qasserpiaat 2006-imi 2007-imilu nunatsinnut takornariarsimanersut.

### *Ulloq unnuarlu aningaasartuutit*

Takornarissat takuniagassanut tammajuitsussanullu aningaasat agguaqatigiissillugit atortagaat kr. 2.500,-inut missingersorneqarput, agguaqatigiissillugu ullut qulit missaat nunatsinniitarsimasut naatsorsorneqarmat - ullormut inummut ataatsinut kr. 250,-it missingersorneqarlutik.

### *Nalilersuineq*

Takornarissat piumaffigineqarsimapput nunatsinniinnerminni misigisaminnik nalilersuissasut – appasinnerpaamik 1-imik qaffasinnerpaamillu 5-imik nalilersueriaaseq atorlugu. Agguaqatigiissillugu tamakkiisumik naliliineq 3,7-imik inerneqarsimavoq. Pinngortitalu nalilerneqarnera qaffasinnerpaasimalluni.

### *Kissaatit*

Aammattaaq nalilersueriaaseq taanna atorlugu piumaffigineqarsimapput nunatsinnukaqqissagaluarunik sunik allanik misigisaqarnissamut kissaateqassagaluarnerisut. Amerlanerit sumiiffik alla tikikkusussinnaassagaluarpaat takusassanillu allanik periarfissanik ujartuerusussinnaallutik.

Misissuinermi aammattaaq takuneqarsinnaapput:

- Takornarissat amerlanersaat, tassa 60 pct.-it missaat, Danmark-imeersuupput
- Takornarissat affaat 50-issit sinnerlugit ukioqarput
- Takornarissat affaasa nunatta qeqqa ornigartarpaat
- Takornarissat amerlanersaat sulinngiffeqarlutik (ferie-rlutik) imaluunniit sulinerminnut atatillugu tikittarput

### *Naatsorsuutit nalorninarsinnaasut*

Ersarissarneqassaaq takornariaqarnermut misissueriaaseq tamakkiisumik takornarissanik naatsorsuinerunngimmat, taamaalilluni takornariaqarnerup 2006-imiit 2007-imut ineriartornera iluamik oqaatigineqarsinnaanani. Takornariaqarneq pillugu paasisutissat misissuinerimi misiligut atorlugu sularineqartut, akissutillu qaffasikkaluartut naatsorsuutit nalorninarsinnaanerat pequtaalluni kisitsisitigut takutissinnaasat killeqarput.

### *Paasisutissat allat ilassutaasinnaasut*

Kisitsisaatit aallaavigalugit immikkut ittumik paasisutissanik allanik piniartoqarsinnaavoq. Assersuutigalugu periarfissaavoq paasisutissat ukiunut, suminngaanneernermit unnuiffigisimasanut akuleriiaarlugit aammalu aningaasartuutinut tunngasut sularineqarsinnaammata. Tamakku Naatsorsueqqissaartarfiup nalinginnaasumik kiffartuusseriaasia atorlugu suliakkiutigineqarsinnaapput.

### *Paasisutissat allat*

Paasisaqarnerorusukkuit siunnersortimut Gitte Lyng Rosing-imut tlf. 36 23 65 (toqqaannar-toq) imaluunniit e-mail-ikkut glmi@stat.gl -imut allallutit saaffiginissinnaavutit.

Inussiarnersumik inuulluaqqusillunga

Gitte Lyng Rosing  
Siunnersorti